

DEO OPT MAX VNI ET TRINO VIRGINIQUE DEIPARÆ ET S. LVCÆ

ORTHODOXORVM MEDICORVM PATRONO.

QVÆSTIO MEDICA.
CARDINALITIIS DISPUTATIONIBVS MANE DISCVTIENDA
IN SCHOLIS MEDICORVM, DIE IOVIS XVII. MARTII,
M. FRANCISCO DES FRANCOIS, Doctore Medico, Præside.

An semel mense Temulentiam prouocare, sanum?

997

IMMODERATA corpori & animo nocitura totâ vitâ fugienda sunt. Bibere vt vomas, vomere vt bibas hominis est intemperantis & salutis suæ parùm studiosi. Semel die satiari cibo, semel hebdomode vti *συνεισμεναι*, semel mense pergræcari, semel anno auertenda arthritidis sudores Laconico promouere, nequè sanitati tuendæ, nequè prorogandæ vitæ consentaneum. Valetudinis leges sic naturæ & virtuti contubernales, *ne quid nimis*, *μὴδὲ ἄλλ', μὴδὲ ὑπερβολήν*. Mensuræ rerum optima, mediocritas. Labor, cibis, potus, somnus, venus, omnia moderata. His carceribus Asfumenda, Admouenda, Educenda, Facienda continentur, quibus tota victus salubris ratio constat. Maxima eorum cura suscipienda, quæ alimentum nobis ministrant; siuè spiritus alant & generent, vt Aer temperamento humidus & calidus: siuè solidas partes reficiant, vt Cibus è mixtorum & animatorum familiâ depromendus: siuè humores restituant, vt Potus tam naturâ quàm arte paratus. Aeris quàm aliorum vsus potior, virium robur à Cibo, à Potu voluptas maior.

COMPARATA Potio ad explendam sitim frigidi & humidi appetitum, qui sedem habet in superiore ventriculi officio. Hoc neruosum cùm sit & exquisitissimi sensus, partium inanitione & siccitate arentium suctionem non sinè molestiâ percipit, & ad Potum exoptandum excitatur; qui quidè & refrigerandi totius corporis, & humidioris substantiæ reparandæ, & alimenti in singulas partes distribuendi gratiâ destinatus fuit. Bibendi tempus cùm Cibus sumitur; quantitas ea quæ partium expleat desiderium; cùm excesserit modum cachexiam, cùm parciior fuerit, marasum illatura. Constat plerosque & omni Cibo annos multos, & Potu omni caruisse, eoque velut præsidio ab hydrope vindicatos. Tàm noxia est calidior quàm frigidior Potio: Illa vrentibus carniū effeminationem, neruorum debilitatem, mentis stuporem, sanguinis eruptiones & animi deliquia affert: Hæc cerebro & pectori inimica conuulsionem & tussim mouet rigoreque febriles. Rigentes de niue, glacie, nitro Portiones calidis infundere visceribus, non est extinguere sitim, sed vitam.

PRÆCIPVA Potionum genera Aqua & Vinum, optima & saluberrima cùm inuicem temperantur: Illa licet ad alendum inepta, quod permista Cibis velocem humidi pinguis & oleosi ex calore inflammationem prohibeat, Potu suo nos habitiores, viuaciores & fecundiores efficit, puritate, tenuitate, leuitate, staterâ non explorandâ prædicabilis. Cocta in vite Aqua Vinum est, gratiâ & succi alibilis bonitate cæteris Potibus antefereendum. Intra mediocritatem sumptum corpori & animo vtilissimum est, *ἀπαλυσμα τὸ ὑγιὲς ἔστιν ἐν ποσίν*. Quamuis calidum & humidum sit, eiustamèn multis nominibus ratio & delectus habendus; vt aliud iuuenibus & biliosis, aliud senibus & pituitosis concedatur. Tàm noxium est pueris, quàm ijs qui infirmo sunt capite. Ne album quidè offereendum febricitantibus, nec sinè aquâ *παραφύειν* sanis. *Ουκ ἐπὶ πᾶσι* aquâ si diluatur non tam citò cerebrum ferit ac inebriat, quàm purum. Multisque persuasum est, calentis Vini Potum ex Calcedoniâ paterâ suauiore esse, & Temulentiam ex aureâ citiùs prouocari.

APOTV Vini pastum exordiri ad Ebrietatem est via; quæ temporaria est animalium functionum deprauatio ab exhalatione & calore Vini cerebri temperiem corrumpente, nata. Vix incomitata procedit: veniunt comites garrulitas, intempestiui risus, ira, furor, oculorum scintillantium rubor & *μυῖα* ingluuiei soboles. Vt ignis oleo, sic meracioribus poculis libido accenditur & veneris furia; quas venæ sectio certiùs cohibeat quàm caphura aut mentha. Meracium aut *Ros Solis* vulgò dictus ex Tryginâ, Saccharo & Ambaro paratus non impunè bibitur. Ne famem quidè *ὁὐκ ἔστι* tutò soluit, aut animo deficientibus auxilio est. Nectam auertit Ebrietatem Amethystus vel Sinarum *Teum*, quàm Aqua de proximo flumine hausta, quâ Vina meliùs castrantur quàm colo. Quis credat nonnullos eo venire dementiae, vt Ebrietatem semel mense prouocandam valetudinis gratiâ consulant: siuè aliquid mutandum velint de statâ consuetudine & nihil non tentandum ac periclitandum; siuè putent ad euacuationem corporum & animorum relaxationem valere Temulentiam; siuè suadeant exonerandum esse vomitu ventriculum, & metasyntericâ Vini facultate exitum fuliginum, sudorum & vrinarum procurandum, pudendo vbiquè errore & improbo consilio.

NE semel quidè committendum quod æternum cruciet. Quid si duodecies in anno, ducenties in vitâ repetatur, quod primâ vice admittendum non fuit? Fœda res est *καταλυσμα* indigna homine ad virtutes & disciplinas nato, morbi confectaria, & epilepsiæ cuiusdam simulachrum. Suauitate Vini facili in consuetudinem venit. Tunc vt lana imbibitum semel colorem, sic pars quâ maximè homines sumus flore Liberi infuccata assumptum agrè deponit vitium. Labe acceptâ aut Mens labat, aut tremunt Artus, aut Lingua balbutit, aut excrementis madet Cerebrum, aut cruditate Viscera laborant, aut totum Corpus suo pondere magis quàm vitâ regitur. Cæterum à securâ & salubri viâ ad periculosum diuerticulum non est deflectendum. Non assurgit animus ad sapientiam & lætitiâ accessione dementiae & furoris. Quod plura ventri quàm capiat dederis, æquum est vt vomas, aut plenitudine ac distentione ægrotes. Quod effluit per vrinas & sudores, dolentis & sub onere gementis Naturæ lachrymatio est. Quod restat in venis & arteriis, quod moratur in visceribus, quod cerebrum inuolat & inebriat, quod totum circumfluit, nisi nunc Mentem & Corpus concutiat, proximis mensibus repetitâ Ebrietate auctum & exasperatum, sanitatem Corporis & Animi integritatem pessundabit.

Ergo semel mense Temulentiam prouocare, non sanum.



Proponebat Lutetiæ PETRVS PERREA V Parisinus, A. R. S. H. M. DC. L.